

## Maketuru ke Pɔl dda are Tite Tite mt3 Tt

### Tar dɔ maketuru te le Tite

Tite to nje-me kunn ke to Jiipi ang. *Ŋ-to kara le nje-buwa-njaje le Pɔl* ngaa *ŋ-dda* kula nya mba tel kungu dewje bbe te Korente ke nje-kayn-kulaje naa te. Tite ee dɔ dere ba te Kerete kare te ke Pɔl dda maketuru neenn are. Naw numa nje-me-kunnje ke lo teenn kare *ŋ-mɔseje* gɔl kulaje lede ke maje.

Pɔl ole me Tite dɔ pa-nja te le dewje ke dɔ Egilisi te. Naw nare ndeje Tite wɔju dɔ kisi te laa ke nje-me-kunnje kara kara : dewje ke tɔku, deneje ke nayn mande bbay, basanje, ke bbereje (2.1-15). Jeju Kiriste are tebbe laa mba kaji dewje me majang te tɔyn (2.14). Pa-nja ke siki ke ase kare nje-me-kunnje njaje le ar dɔ tar te neenn le.

*Kare te ke Pɔl* dda maketuru are Timote, ke Tite le, nje-me-kunnje ejeje to Jeju a tel ddee njange neenn ang bbay. Maji kare e-sangeje ddew ta kare pa-nja lede to ke maje ke lew.

### *Tar lapiya le Pɔl*

<sup>1</sup> Ema Pɔl, m-to nje-kula le Lubba ddem nje-kayn-kula le Jeju Kiriste ddem. Lubba unnum to nje-dda kare dewje ke Lubba mberede unnje mede ngaa kare *ŋ-gereje* tar ke tɔkɔɔ bba ta *ŋ-ngemje* rɔde mba Lubba. <sup>2</sup> Yeenn bba da kundaje mede to dingaje tebbe ke ke ndɔ ke ndɔ. Lubba ke ere ngem ndɔ kara ang unn ndue lew baa ta kareje tebbe ke ke ndɔ ke ndɔ le. <sup>3</sup> Kare ase a, Lubba tee ke tar laa le ke ddaka ddew tar te ke *ŋ-pa* narem. Lubba ke nje-kajije le inya tar le me jim te ngaa nunn ndu narem ta kare mila mber-tar le.

<sup>4</sup> Mula ke maketuru neenn mari, ei Tite ke e-to ngonnum ke tɔkɔɔ ddeew me-kunn te ke mbɔnje. Maji kare Lubba ke Bɔ, ke Nje-kajije Jeju Kiriste ddaje sei me-maji ngaa dareje mei wul lom.

*Tar le dewje ke dɔ* Egilisi te

<sup>5</sup> Minyai dɔ dere maann te, bbe te ke Kerete kare e-mɔse gɔl neje ke naysn bbay e-tunga ngaa ta kare unda ansiyenje me bbeje te kara kara toke m-pa mari. <sup>6</sup> Maji kare ansiyenje to dew ke tar to dɔe te kara ang, n̂-to nje-dene ke kara, maji kare nganne unnje mede ngaa dewje undaje tar dɔde te wɔju dɔ pa-nja lede wase dɔ-ngeng lede ang. <sup>7</sup> Dew ke dɔ Egilisi te to nje-ngem ne le Lubba are maji kare tar to dɔe te kara ang. Maji kare noo rɔe bo ang, n̂-to nje-wungu ang, n̂-to bbere le koto ang, n̂-to nje-kunda dew ang, maji kare bbo kinga nare hɔy hɔy baa ddae ang. <sup>8</sup> A maji kare n̂-gere ta ngem nje-mbaje ngaa keje dda ne ke maji dɔɔ a to mee te. Maji kare n̂-to dew ke gere dɔ jia, n̂-to gate gate, n̂-to dew ke ndiki ne-yerew ang ngaa n̂-gere ta tɔ bbo ke da-rɔ te. <sup>9</sup> Maji kare nuwa tar ke tɔkɔɔ ke to ddeew kara baa ke ne ke n̂-tɔje le nare ngeng. Yeenn bba na kase kɔsu kutu dewje ke kete ddeew ne-tɔju te ke maji tɔyn ngaa na kase tɔju dewje ke aw maynje saa tar ne ke ulade naa te.

*Tar ne-tɔju ke ke dɔgɔle ang*

<sup>10</sup> Tɔkɔɔ nje-dɔ-ngengje, nje-kundaje bula baa, ke nje-kereje dewje banyaje nya, uta tɔyn, n̂-banyaje nya horo Jiipije te ke ooje mede te. <sup>11</sup> Maji kare uwa tade, mba daw n̂-tujuje keje le dewje tɔyn ke eeje me nujuje te kara kara. Daw n̂-tujuje ne ke ase kare dew tɔju ang mba kinga ne nare hɔy hɔy baa. <sup>12</sup> Mare kara horode te ke to nje-kila mber-tar lede pa na: « Nje ke dɔ dere maann te ke Kerete to nje-ngemje lew baa, n̂-toje to daje ke ddaje

dingaw nya, *h*-toje to nje-dabbeje, keje ne-kusa dɔɔ a to dɔde te.» <sup>13</sup> Tar laa le to tar ke tɔkɔɔ njaa. Yeenn a, maji kare e-ndagede ke singa, mba kare me-kunn lede to gate gate. <sup>14</sup> E-ndagede are daaje lo ke tar ngemje te ke lew ke Jiipije aw turaje ang ddem, daaje lo ke nduje te le dewje ke turuje giride are tar ke tɔkɔɔ ang ddem. <sup>15</sup> Ne tɔyn to maji wɔju dɔ dewje ke mede nda kayn. A dewje ke ne-yerew to mede te ngaa mbeteje ta kunn mede, ne kara to maji wɔju dɔde ang, mba ne-yerew tuju ne-gere lede ddem keje lede ddem. <sup>16</sup> *h*-paje na *h*-gereje Lubba, a kula ddade tɔju to *h*-gereje Lubba ang. *h*-majije ang, *h*-toje to nje-dɔ-ngengje, daseje ta dda kula ke maji kara ang.

## 2

### *Ndeje wɔju dɔ bbukaje*

<sup>1</sup> A ei Tite, maji kare e-tɔju ne ke to ddew kara baa ke ne-tɔju ke maji tɔyn. <sup>2</sup> E-pa are bbukaje ngemje rɔde, *h*-ddaje dare dewje bbeelde ngaa dare keje lede to ke maje. Are darje dɔ me-kunn te lede ke tɔkɔɔ, are *h*-ndikije naa ngaa duwaje dare ngeng. <sup>3</sup> Ddew kara baa, e-pa are deneje ke tɔku ngemje pa-nja lede to dewje ke unnje rɔde dang mba dda kula le Lubba. Maji kare *h*-toje to nje-naneje ang ddem *h*-toje to bbereje le koto ang ddem. Maji kare ne ke maji a *h*-tɔjuje. <sup>4</sup> Maji kare *h*-tɔjuje deneje ke naynje mande bbay dare *h*-ndikije ngawdede, ke ngannde, <sup>5</sup> dare keje lede to ke maje, *h*-ngemje rɔde, *h*-ddaje kula ngaw lede, dare mede maji ngaa dooje ta ngawdede. Baann bba dewje a paje Tar ke maji ang dɔ tar te le Lubba ang.

### *Ndeje wɔju dɔ basanje*

<sup>6</sup> Ddew kara baa e-ndeje basanje are keje lede to ke maje <sup>7</sup> me neje te tɔyn. Ei njaa kara maji kare e-to ne-kɔju mare

ddew kula ddai te ke maji. E-tɔju ne ke dɔgɔle ddem, e-ndam ne ang ddem. <sup>8</sup> Maji kare tar-pa lei to ke ddewe bba kare dew ase mayn sei tar le ang. Baann bba kare rɔ-kul dda nje-baanji lei mba dingaje mare ne ke maji ang ten ta pa dɔje te ang.

<sup>9</sup> Maji kare e-pa are bbereje ooje ta ebbedede me neje te tɔyn. Maji kare n̂-sangeje ddew mba maji kem ebbedede te, n̂-maynje ke de tar ang, <sup>10</sup> ngaa n̂-bbokoje mare ne lede ang. Maji kare n̂-toje gate gate kem ebbedede te ke ndɔ tɔyn. Baann bba da dda kare dewje bbeelje ne-tɔju le Lubba ke to Nje-kajije.

<sup>11</sup> Mba Lubba tɔju me-maji laa ke to ddew ke dewje tɔyn aseje ta kingaje ne kaji. <sup>12</sup> Me-maji laa le tɔjuje kare jinyaje pa-nja leje ke maji ang, ke bbo neje ke nangê neenn, mba kare pa-nja leje to ke dɔgɔle ddem to ke danna ngaa to gate gate ddem nɔ Lubba te. <sup>13</sup> N-ddaje toke baann ta ngina ne ndɔ kisi ke koko leje ke jundaje meje dɔe te. To ndɔ ke tɔku Lubba leje ke to Nje-kajije Jeju Kiriste a ddee ke ndoko laa. <sup>14</sup> Nunn rɔe njaa nare yo wɔju dɔje mba kɔruje me majang te ngaa ta toko yerew leje kare n̂-toje to dewje laa njaa ddem, kare n̂-toje to dewje ke eeje ke bbo nya mba dda kulaje ke maji ddem.

<sup>15</sup> Maji kare e-pa tar toke baann, are ndeje ngaa e-ndange ne ke singa. E-dda are dew kara dabbi ang.

### 3

#### *Pa-nja le nje-me-kunnje*

<sup>1</sup> Ole me nje-me-kunnje tɔyn are n̂-bbeel tɔku-mbayje, ke nje-kɔn bbeje. Maji kare dooje tade ta n̂-toje ngɔsi mba dda ne tɔyn ke maji. <sup>2</sup> Maji kare n̂-tajije dew ang, n̂-toje to nje-ddɔje ke dew ang, maji kare n̂-toje to nje-me-majije. Maji kare n̂-toje to dewje ke wul pee ke dewje tɔyn ke ndɔ tɔyn. <sup>3</sup> Mba jeje njaa kara lew n̂-toje to mbeje, n̂-toje to

nje-kalje ta, *h*-ndeenje ddew, bbo neje ke maji ang, ke rɔ-neel dang dang uta dɔje. Pa-nja leje maji ang ngaa me ddaje, dewje mbetejeje ngaa *h*-mbeteje naa tɔ. <sup>4</sup> A kare ke Lubba ke to Nje-kajije tɔju me-maji laa, ke ndiki ke *h*-ndiki dewje a, <sup>5</sup> najije. Najije wɔju dɔ ne ke gate gate ke *h*-ddaje ang. A najije mba noo kem-to-ndoo leje nare *h*-ddee to dewje ke siki ddew toko ke *h*-tokoje ddem ddew te le Ndil-me-nda ddem. <sup>6</sup> Lubba are Ndil le ddee dɔje te ke me-kara ddew te le Jeju-Kiriste ke to Nje-kajije. <sup>7</sup> Yeenn a, ddew me-maji te laa le *h*-dda nare *h*-ddeeje gate gate keme te ngaa kare jingaje tebbe ke ke ndɔ ke ndɔ ke jundaje meje dɔe te le.

<sup>8</sup> Tar neenn to tar ke ase kare dew unda mee dɔe te. M-ndiki ta kare ar dɔe te nya, mba kare dewje tɔyn ke undaje mede dɔ Lubba te unnje rɔde mba dda kulaje ke maji uta. Yeenn to ne ke kura ngaa aw dda maji ke dewje. <sup>9</sup> A e-mbete kuru gel neje ke baa baa, gel kajeje, ke mayn naa tarje ke baa, ke koo ta naa ang wɔju dɔ ndu: to neje ke dda maji ke dew ang ddem to neje ke baa ddem. <sup>10</sup> E-ndɔru mbi dew ke aw tin nje-me-kunnje gɔl kara, gɔl joo, a bbo goe te a, ilae ddaka. <sup>11</sup> E-gere to dew ke baann ndeem ddew. Ne njaa naw *h*-gange sariya dɔ rɔe te ddew majang te ke *h*-nayn ddewe te naw *h*-dda.

### Dɔbɔyn tar le Pɔl

<sup>12</sup> Bbo mula Aretemase wase Tisike rɔi te a, e-dda gan e-ddee ingam bbe te ke Nikopolisi, mba lo ke m-ndiki ta kaw kisi te dɔ neyn kul te ann. <sup>13</sup> Unda mei ta kuma Jenase ke to nje-gere ndu nya, de ke Apolose lo-kaw te lede are mare ne dude ang. <sup>14</sup> Maji kare kese nje-me-kunnje kara unnje rɔde tɔyn ddaje kulaje ke maji. Yeenn bba da kingaje neje ke mede ndiki ta kinga njange baa ngaa da toje to dewje ke kari baa ang.

<sup>15</sup> Dewje tɔyn ke eeje sem neenn ddaije lapiya. E-dda lapiya nje ke ndikijeje ke toje to nje-me-kunnje tɔ areje. Maji kare Lubba dda me-maji kese tɔyn!

Tar le Lubba ke tar Kabba  
Kaba: Tar le Lubba ke tar Kabba Bible

copyright © 2015 Wycliffe Bible Translators, Inc.

Language: Kabba

Contributor: Wycliffe Bible Translators, Inc.

All rights reserved.

2020-11-18

---

PDF generated using Haiola and XeLaTeX on 14 Jun 2022 from source files dated 25 Mar 2022

42d55340-9c90-56ec-bf99-50cbf96e48a7